

Aruba a perde un gran baluarte musico, Arnaldo Bibi Gibbs

— Arnaldo Humberto Gibbs, miho conoci como 'Bibi', kende a nace riba 2 di juli 1966 y a fayece dia 8 di februari 2022 na Colombia.

Den persona di Bibi Gibbs Aruba a perde otro gran baluarte musico y gran trombonista, kende a contribui grandemente den Aruba su cultura musical, deporte y un gran persona, amigo, un agente policial di KPA y un bon tata di familia. Bibi hunto cu su compaņera Milusca Maduro, nan tin un yiu Arnalda Gibbs.

Cu edad hopi hoben Arnaldo 'Bibi' Gibbs a cuminsa practica algo cu e tabata gusta hopi: Esta 'Baseball'. Hunto cu su ruman grandi Austis, nan tabata train den cura, p'asina despues hunga e posicion di 'catcher' den e ekipo di Little League Sapolin'.

Bibi su prome experiencia musical tabata cu e 'Brassband' di Scout di San Nicolas.

Na un edad di 13 aña, Bibi hunto cu su ruman Austis, a cuminsa toca cu 'Dynamic Sound', y un aña despues nan a pasa pa 'Control Power' pa algun tempo. Y El a sigui su carera musical despues cu 'Akai Brass'.

Na aña 1988 'Bibi' a bay milita den e banda; 'The Musical Time' bou direccion di Sr. Elgin Juddan d.f.m. Cu 'The Musical Time' el a representa Aruba internacionalmente na varios ocasion. Entre otro na Corsou, Boneiro, New York, Miami, St. Maarten. Akinan 'Bibi' tabata forma parti di un seccion di 'brass' consistiendo di e Maestro Franklin Granadillo, Humphrey Hewitt, Eddy Ras y John Ras.

'Bibi' a forma parti tambe di e seccion di 'brass' di 'Formacion PRIDE' bou direccion di Juan Carlos 'Bulu Vloria' cu su amigonan Tarzan Jimenez, Oslin Trimon, Faroud Henriquez, Franklin Granadillo, John Ras y Larry Hoo.

Entre 1992 pa 1995, 'Bibi' tabata residencia na Hulanda, caminda el a toca cu



e banda musical 'Los Barones', hunto cu su amigonan Dolfi Richardson, Alfredo Ruiz, Franklin Giel y Giovanni Tromp. 'Bibi' a forma parti aya na Hulanda cu e agrupacion 'Pegasaya' hunto cu Jersey Isenia y Kenneth Thielman.

Despues na Aruba 'Bibi' a forma parti den 'Super Orquesta Quasi' bou direccion di Meiler Laurens d.f.m.

Tambe el a forma parti di 'Claudius Phillips y su grupo Oreo', hunto cu Tarzan Jimenez, Reinaldo Suarez y Giovanni Romero riba 'brass'. 'Bibi' hunto cu e Maestro Frank Granadillo, Brother Pantophlet, su Omo Bulto Gibbs, nan a toca den 'The Aruban Band'.

'Bibi' a forma parti di 'Caribbean Big Band' bou direccion di e Maestro Ed-


uardo Maya awe d.f.m.

Durante ultimo añanan 'Bibi' a forma parti di 'Maestro Franklin Granadillo Big Band', cual a sa di duna presentacionnan sublime durante e.o. 'Caribbean Sea Jazz Festival', y tambe a toca riba dianan nacional, manera 18 di maart etc.

Den Festivalnan di Calypso/Roadmarch y Tumba, 'Bibi' a sa di acompaña masha hopi cantante den e festivalnan aki, tocando pa mayoria bandanan local den un solo anochi di festival. 'Bibi' tambe a acompaña diferente Rey/Reinanan den e festivalnan aki.

'Bibi' Gibbs a forma parti di diferente orkesta acompaņando festival di calypso/roadmarch infantil, y tambe Tumberito.

Ademas diesaki 'Bibi' a forma parti di e 'Drumbands'



di Douane, Brandweer, y di Cuerpo Policial Aruba, fuera di esey El a forma parti di diferente 'brassband' local entre otro 'Bad Boyz Brassband'. Un

gradicimento na 'Bibi' pa su gran contribucion na Aruba su cultura musical y pa tur loke el a laga atras como bon ehempel pa nos hobennan.